


## GREMÉCHÉ DE LAINNE



Tchaint qui y muse, y en aî encoué mâte ès brais ! Vos vos demaindèz de quoi y vais djâsaie, mains tot simpymment des peûfnèes d'étchvâs de laine greméchlèes. Dains le temps, lai laine ne s'aitchetaie qu'en étchvâ. Le bout simple, flè po renfôchie les capattes des tchâsses, s'aitchetaie è paît, en petèt greméché. Cmen note graind'mère vétchie d'aivô nos, ç'ât lée que tchâssnaie po tote lai rotte. Sîetèe dains son fateuil, in tcheûssin dôs le fèssie po lai sôlaidgie des couérbétures de

lai véyaince, in tchaimelé dôs ses pîes, les breulétches su le bés di nâ, ç'ât le seuvni qui voidge de cte bouénne graind'mère.

Ci seuvni li ât pus bé que ctu qui voidge des séainces, y allôs dire crovèes, des étchvâs de laine. En lai sôtchie de l'écôle, graind'mère me tcheuyie dje su le seuyat de l'hôtâ.

« Hé, baichnatte, te t'aimouéne ? Y n'aî pus de laine po fini de tchâssnaie les tchâssattes de ton pére ! » Y saivôs ço que m'aittädaie. D'in couatchon è pouétchè de main, èlle tirie feûs in étchvâ de laine. Chneuquè, épyeutchnè, revirie dôs des annèes, ci couatchon c'était pée qu'in fonds de maigaisin ! Les étchvâs de laine se môessyaînt aivô les babines de flé, les tacons. C'était aito li qu'èlle coitchie ses mouérieres ; en tchâssnaint, èlle tchelaie des bonbons à dgigolisse.

L'étchvâ oûetchenè, embouélè dains les mains, graind'mère le virie, revirie de totes les sens po y rebaiyie sai fôrme, po l'éleûchè su mes brais. Aivô aippyication èlle tchriè le bout de lai laine pe greméchlaie. A feur et è mésure que le greméché prenayaie de lai grôssou, graind'mère botait ün, doux, trôs doigts dôs lai laine écrâchée. Paifois d'ène petète nyaffe, èlle traquaie les tchaitons que djuaînt, aitchilosès pai le flé de laine que panguéyie, ès boussiattes voué èlle détcherpaie les nouds de lai laine. Sôle, y béssie les brais. Adon, graind'mère éyeuvè lai voix po me recommaîdaie d'éleuchè les brais !

Dains ces môments-li, moi i musôs : « Quées crovèes ces étchvâs ! » Aivô le retchul des annèes, y muse : « Qués boussiattes de bouénheu c'était ces étchvâs de laine ! »

Graind'mère, li enson, tchâssène-te aidé ?